



TAJUK KHUTBAH JUMAAT

Siri: 01/2024

MUHASABAH DAN AZAM TAHUN BARU

5 Januari 2024

Bersamaan

23 Jamadilakhir 1445

DIKELUARKAN OLEH:

**JABATAN HAL EHWAL AGAMA
TERENGGANU**

PERINGATAN:

Adalah diingatkan bahawa sebarang penambahan dan pemindaan terhadap isi kandungan teks khutbah yang telah disediakan oleh Jabatan Hal Ehwal Agama Terengganu adalah **DILARANG**.

Khatib yang bertugas hendaklah menyemak kembali **RUKUN, AYAT AL-QURAN** dan helaian muka surat yang diterima. Pastikan teks dibaca terlebih dahulu sebelum menyampaikan khutbah.

KHUTBAH PERTAMA

أَحْمَدُ لِلَّهِ رَبِّ الْعَالَمِينَ، وَبِهِ نَسْتَعِينُ، عَلَى أُمُورِ الدُّنْيَا وَالْآخِرَةِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ،
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَمَنْ سَارَ عَلَى
نَهْجِهِ إِلَى يَوْمِ الدِّينِ.
أَمَّا بَعْدُ، فَيَا أَيُّهَا الَّذِينَ آمَنُوا اتَّقُوا اللَّهَ، وَابْتَغُوا إِلَيْهِ الْوَسِيلَةَ،
وَجَاهِدُوا فِي سَبِيلِهِ لَعَلَّكُمْ تُفْلِحُونَ.

Marilah sama-sama kita melakukan segala usaha dan bersungguh-sungguh meningkatkan ketakwaan kita kepada Allah SWT dengan menjunjung segala titah perintah-Nya dan menjauhi segala larangan-Nya. Sesungguhnya berbahagialah orang-orang yang bertakwa kepada-Nya.

Khutbah pada hari ini akan membicarakan tajuk:

MUHASABAH DAN AZAM TAHUN BARU

Sidang Jumaat yang berbahagia,

Alhamdulillah, dengan rasa penuh kesyukuran, kita sekali lagi diberi peluang untuk melangkah kaki ke tahun baru Masihi 2024. Sama ada kita sedar atau tidak, kedatangan tahun baru ini sebenarnya menandakan usia kita semakin meningkat dan kita semakin menghampiri saat kematian.

Telah menjadi satu tradisi, apabila datangnya tahun baru, kita menyambutnya dengan semangat yang baru, azam baru, diari baru dan segala-galanya baru. Sebenarnya dalam Islam, kita sentiasa dituntut untuk patuh dan taat kepada Allah pada setiap masa, dari awal tahun hingga akhir tahun, dari umur baligh hinggalah ke liang lahad. Firman Allah SWT dalam surah Al Hijr, ayat 99:

 وَأَعْبُدْ رَبَّكَ حَتَّىٰ يَأْتِيَكَ الْيَقِينُ

Maksudnya: Dan sembahlah Tuhanmu, sehingga datang kepadamu perkara yang tetap dan yakin (kematian).

Apa pun, tidak menjadi kesalahan apabila tradisi dan budaya menyambut tahun baru ini kita selarikan dengan kehendak dan tuntutan Syarak. Apabila ditanya mengenai azam, masing-masing akan menyatakan azam dan cita-cita dengan pelbagai nada dan bunyinya. Namun, agak jarang sekali kita dengar, orang yang menyuarakan cita-cita untuk menjadi hamba Allah yang lebih bertakwa, lebih pemurah, lebih patuh atau taat kepada hukum Allah dan lebih menghayati ajaran Islam secara menyeluruh.

Tidak salah untuk menanam azam. Tetapi biarlah seimbang dalam usaha mencari kecemerlangan dunia dan akhirat. Selain itu, usaha yang bersungguh-sungguh perlu disusuli supaya cita-cita dan azam tersebut menjadi realiti bukannya sekadar angan-angan kosong.

Justeru, mimbar Jumaat pada hari ini ingin menyeru agar umat Islam lebih mengutamakan kebaikan, menjauhi kejahatan, bersifat amanah, bertanggungjawab, berdisiplin dan jujur dalam setiap gerakkerja.

Saudara Muslimin yang dikasihi,

Pada masa yang sama, umat Islam wajar sentiasa bermuhasabah diri pada setiap masa, adakah kita menepati sasaran yang dituntut oleh Allah Ta'ala supaya menjadi hamba yang taat. Kerana inilah asas utama dalam mensejajarkan diri dengan tujuan hidup yang sebenar, iaitu semata-mata untuk beribadat kepada Allah SWT, bukannya mencari keseronokan duniawi semata-mata. Firman Allah SWT dalam surah az-Dzariyat, ayat 56:

﴿٥٦﴾ وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ

Maksudnya: Dan Aku tidak menciptakan jin dan manusia melainkan untuk mereka menyembah-Ku.

Setahun yang berlalu sudah pasti melakarkan catatan-catatan penting yang boleh dijadikan pengajaran dan iktibar. Jikalau pada tahun lalu, banyak kepincangan-kepincangan yang telah berlaku dalam kehidupan kita sama ada secara disengajakan atau tidak, maka pada tahun ini kita berazam untuk tidak mengulangi lagi kepincangan yang sama. Jikalau pada tahun lalu kita telah menempa beberapa kejayaan dan kecemerlangan, maka pada tahun ini biarlah kita mencipta kejayaan yang lebih baik daripada tahun sudah, kerana seorang muslim akan sentiasa mengarahkan diri mereka ke arah yang lebih baik. Mudah-mudahan kita tidak tergolong dalam kalangan mereka yang dikecam keras oleh Saidina Umar RA:

“Celakalah bagi orang muslim yang hari ini lebih buruk dari hari semalam dan hari esok lebih buruk dari hari ini.”

Ikhwaniyal Muslimin,

Satu perkara lagi yang perlu diberi perhatian serius oleh kita semua, ialah pengisian sambutan tahun baru. Tahun baru sepatutnya disambut dengan penuh rasa syukur kepada Allah; dengan berdoa atau menganjurkan program keilmuan, kerohanian dan kemasyarakatan yang boleh membina sahsiah dan mendekatkan diri kepada Allah SWT, bukannya melakukan perkara yang boleh mengundang kemurkaan Allah SWT.

Program-program seperti forum, munajat dan selawat perdana, turun padang santuni gelandangan, larian atau konvoi solidariti dan sebagainya, adalah wajar diperbanyakkan. Mudah-mudahan ia akan dapat mendekatkan diri kita, keluarga dan masyarakat negeri ini dengan budaya hidup yang diredhai Allah dan selaras dengan syariat, sekaligus membabit kemanisan dan keindahan tatacara hidup Islami.

Semoga pada suatu masa nanti, program-program bermanfaat sebegini juga akan dapat membanteras terus apa jua acara sambutan tahun baru yang salah, melalaikan dan dicemari unsur maksiat dalam kalangan masyarakat kita. Ingatlah amaran Allah dalam surah al-Ghafir, ayat 75:

ذَٰلِكُمْ بِمَا كُنتُمْ تَفْرَحُونَ فِي الْأَرْضِ بِغَيْرِ الْحَقِّ وَبِمَا كُنتُمْ تَمْرَحُونَ ﴿٧٥﴾

Maksudnya: Lalu dikatakan kepada mereka setelah ditimpakan dengan azab seksa: “Balasan buruk yang demikian ini disebabkan kamu dahulu bersukaria di muka bumi dengan cara yang salah dan disebabkan kamu bersenang-lenang dan bermegah-megah dengan berleluasa (dalam maksiat)”.

Muslimin yang dimuliakan,

Mengakhiri khutbah pada hari yang mulia ini, marilah kita sama-sama menjadikan tahun baru ini sebagai titik tolak untuk memperelokkan akhlak dengan mencontohi peribadi Rasulullah SAW kerana Baginda adalah contoh terbaik sebagaimana ditegaskan Allah melalui firman-Nya dalam surah al-Ahzab, ayat 21:

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ

وَالْيَوْمَ الْآخِرَ وَذَكَرَ اللَّهَ كَثِيرًا ﴿٢١﴾

Maksudnya: Sesungguhnya, adalah bagi kamu pada diri Rasulullah itu contoh ikutan yang baik, iaitu bagi orang yang sentiasa mengharapkan keredhaan Allah dan balasan baik hari akhirat, serta ia pula menyebut dan banyak mengingati Allah.

Adalah diharapkan juga moga tahun ini akan menjadi tahun yang lebih baik dan lebih cemerlang berbanding tahun-tahun lepas. Dalam mengimpikan hasrat ini, tekad dan usaha perlu berjalan selari, kerana kejayaan tidak akan datang bergolek. Begitu juga dengan kebaikan, tanpa azam dan pegangan kukuh pada nilai murni, ia tidak akan dapat dicapai.

أَعُوذُ بِاللَّهِ مِنَ الشَّيْطَانِ الرَّجِيمِ

يَأَيُّهَا الَّذِينَ ءَامَنُوا اتَّقُوا اللَّهَ وَلْتَنْظُرْ نَفْسٌ مَّا قَدَّمَتْ لِغَدٍ ۖ

وَاتَّقُوا اللَّهَ ۚ إِنَّ اللَّهَ خَبِيرٌ بِمَا تَعْمَلُونَ ﴿١٨﴾

Maksudnya: “Wahai orang yang beriman! Bertakwalah kepada Allah; dan hendaklah tiap-tiap diri melihat dan memerhatikan apa yang ia telah sediakan untuk hari esok. Dan bertakwalah kepada Allah, sesungguhnya Allah Amat Meliputi Pengetahuan-Nya akan segala yang kamu kerjakan.”

(Surah al-Hasyr, Ayat 18)

بَارَكَ اللَّهُ لِي وَلَكُمْ بِالْقُرْآنِ الْعَظِيمِ،
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ،
وَتَقَبَّلَ اللَّهُ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ،
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ،
وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ،
فَأَسْتَغْفِرُوهُ، إِنَّهُ هُوَ الْغَفُورُ الرَّحِيمُ.

KHUTBAH KEDUA

الْحَمْدُ لِلَّهِ رَبِّ الْعَالَمِينَ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ، وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا عِبَادَ اللَّهِ! اتَّقُوا اللَّهَ فَقَدْ فَازَ الْمُتَّقُونَ.

Sidang Jumaat yang dirahmati Allah,

Berbaktilah kepada Allah SWT dan jagalah setiap gerak geri dan tutur kata. Setiap tindakan yang dilakukan dan setiap perkataan yang diucapkan pasti akan dicatat oleh malaikat. Sesungguhnya setiap manusia akan diserahkan buku amalan masing-masing pada hari Akhirat nanti, dan ketika itu setiap yang tercatat dalam buku amalan tidak dapat diubah dan tak dapat dipinda lagi. Mudah-mudahan dengan peringatan ini, kita akan menjadi hamba Allah yang mendapat rahmat serta keampunan-Nya dan dimasukkan ke dalam syurga bersama kekasih kita Nabi Muhammad SAW.

Marilah juga kita memperbanyakkan ucapan selawat dan salam kepada Rasulullah SAW sebagaimana firman Allah dalam surah al-Ahzab ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

اللَّهُمَّ صَلِّ عَلَى سَيِّدِنَا مُحَمَّدٍ، وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا
إِبْرَاهِيمَ، وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ، وَعَلَى آلِ سَيِّدِنَا
مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ، وَعَلَى آلِ سَيِّدِنَا إِبْرَاهِيمَ فِي الْعَالَمِينَ،
إِنَّكَ حَمِيدٌ مُجِيدٌ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ
وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْفَحْشَاءَ مَا لَا يَصْرِفُهُ غَيْرُكَ.

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنَ السَّيِّئِ الْأَسْقَامِ. اللَّهُمَّ اشْفِ
مَرْضَانَا وَارْحَمْ مَوْتَانَا، وَالطِّفْ بِنَا فِيمَا نَزَلَ بِنَا.

اللَّهُمَّ احْفَظْ مَوْلَانَا الْوَاتِقَ بِاللَّهِ السُّلْطَانَ مِيزَانَ زَيْنِ الْعَابِدِينَ، ابْنَ الْمَرْحُومِ
السُّلْطَانِ مُحَمَّدِ الْمُكْتَفِيِّ بِاللَّهِ شَاهٍ، وَأَنْزِلِ الرَّحْمَةَ عَلَيْهِ وَعَلَى السُّلْطَانَةِ نُورِ
زَاهِرَةَ، سُلْطَانَةِ تَرَعَّكَانُو.

وَاحْفَظْ أَوْلَادَهُ وَأَهْلَهُ وَرَعَايَاهُ مِنَ الْمُسْلِمِينَ وَالْمُسْلِمَاتِ فِي الدُّنْيَا وَالْآخِرَةِ،
بِرَحْمَتِكَ يَا أَرْحَمَ الرَّاحِمِينَ.

اللَّهُمَّ احْفَظْ وِلِيَّ الْعَهْدِ تَعَكُّو مُحَمَّدَ إِسْمَاعِيلَ ابْنَ الْوَاتِقِ بِاللَّهِ السُّلْطَانَ مِيزَانَ
زَيْنِ الْعَابِدِينَ.

اللَّهُمَّ أَعِزِّ الْإِسْلَامَ وَالْمُسْلِمِينَ، وَأَذِلِّ الْمُعْتَدِينَ الظَّالِمِينَ، وَدَمِّرْ أَعْدَائِكَ أَعْدَاءَ
الدِّينِ، وَانصُرْنَا عَلَيْهِمْ يَا رَبَّ الْعَالَمِينَ. اللَّهُمَّ انصُرْ إِخْوَانَنَا الْمُسْلِمِينَ
وَالْمُجَاهِدِينَ فِي فَلَسْطِينَ وَفِي كُلِّ مَكَانٍ.

Ya Allah,

Kami memohon hidayah dan petunjuk ke jalan kebenaran. Tetapkanlah iman kami di dalam agama-Mu. Basahilah lidah kami dengan bacaan al-Quran dan zikir kepada-Mu. Jadikanlah akhlak junjungan besar Nabi Muhammad SAW sebagai ikutan kami. Pereratkanlah hubungan sesama kami, saling bekerjasama dan bantu membantu dalam kebajikan dan taqwa.

Ya Allah

Jadikanlah negeri ini negeri yang aman, maju lagi diberkati. Bukakanlah pintu-pintu rezeki dari segala penjuru. Kurniakanlah kepada kami nikmat kesejahteraan yang berterusan. Jauhkanlah negeri kami ini daripada segala malapetaka, musibah dan apa jua kemurkaan-Mu.

Ya Allah,

Anugerahkan pertolongan dan bantuanMu untuk saudara kami di Palestin. Berikanlah ketabahan dan kekuatan kepada mereka dalam menghadapi kekejaman rejim zionis. Peliharakanlah bumi Baitul Maqdis dan seluruh saudara kami di sana.

آمين يا الله، يا رب العالمين

رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ .
وَصَلَّى اللهُ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّمَ .
وَالْحَمْدُ لِلَّهِ رَبِّ الْعَالَمِينَ .

عِبَادَ اللهِ!

إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ
فَاذْكُرُوا اللَّهَ الْعَظِيمَ يَذُكِّرْكُمْ، وَاشْكُرُوا لَهُ عَلَى نِعْمِهِ يَزِدْكُمْ،
وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ .
قُومُوا إِلَى صَلَاتِكُمْ، يَرْحَمْكُمْ اللهُ .

